

MEKEM RERE BLONG GO INSAED LONG
TABU TEMPOL



MEKEM RERE BLONG GO INSAED LONG
TABU TEMPOL

Oli karem ol toktok we i stap ia long buk ia *The Holy Temple*,
we i kam long Boyd K. Packer

kova long fored: Sol Lek Tempol
kova long bak: Laie Hawaii Tempol

© 2006 i kam long Intellectual Reserve, Inc.

Oli holem evri raet

Oli printim long Yunaeted Stet blong Amerika

Oli letem long Inglis: 8/02

Oli letem Translesen: 8/02

Translesen blong

Preparing to Enter the Holy Temple

Bislama

KAM LONG TEMPOL

I gat plante risen from wanem wan bae i wantem go long tempol. Mo tu, olsem wanem hem i luk aotsaed i stap givim tingting long ol bigfala stamba tingting blong spirit. Plante moa samting we i stap insaed long ol wol blong haos blong hem, i soem gud tingting ia. Antap long doa blong tempol, i gat bigfala toktok "Holines long Lod." Taem yu go insaed long wan tempol we oli dediketem finis, yu stap insaed long haos blong Lod.

Insaed long Jos, yumi bildim eni kaen bilding. Insaed long olgeta, yumi stap wosip, yumi stap tij, yumi stap gat ol pleplei, yumi oganaesem ol samting. Insaed long ol bilding ia o long ol ples we yumi save rentem, yumi save oganaesem ol stek mo ol wod mo ol misin mo ol kworom mo ol Rilif Sosaeti. Be taem yumi oganaesem ol famle folem oda we Lod i bin rivilim, yumi stap oganaesem olgeta insaed long ol tempol. Mared long tempol, siling odinens ia, i blesing we i moa hae bitim eni nara blesing, we yu save kasem insaed long tabu tempol.

Insaed long ol tempol, ol memba blong Jos we oli klin inaf, oli save tekem pat long ol odinens blong sevem man, we oli bin rivilim long ol man. Long ples ia, long wan tabu seremoni, oli wasem mo anoentem mo givim instraksen mo mekem endaomen mo silim wan man o woman. Mo afta we yumi kasem ol blesing ia blong yumi wanwan, yumi save mekem ol wok ia long bihaf blong olgeta we oli bin ded be oli no bin gat janis blong kasem ol blesing ia. Insaed long tempol, oli stap mekem ol tabu odinens ia blong olgeta we i stap laef mo olgeta we oli stap ded i semmak nomo. Hemia ples blong baptaes, we olgeta we oli laef oli mekem ol baptaes blong olgeta we oli bin ded, mo ol memba we oli klin inaf nomo oli stap olsem proksi blong olgeta we oli bin ded.

“Kam long tempol.” Sapos i no naoia, be kam afta, be ino longtaem tumas afta. Prea strong, mekem ol laef blong yufala i stap long oda, sevem evri mane we yufala i save sevem, mo stap hop se bae dei ia bae i kam. Statem naoia i go blong wokbaot long rod blong sakem sin, we samtaem i had mo yufala i harem se yufala i wantem lego. Tempol i stap jenisim ol man mo woman mo evri hadwok we yufala i stap mekem blong kasem ples ia, bae i gat bigfala praes blong hem. Long olgeta we oli stap laef longwe long tempol, ating tempol bae i kasem yufala bifo yufala i kasem tempol. Kipim fet mo hop blong yufala mo mekem strong tingting se bae yufala i kam— se bae yufala i klin inaf mo bae yufala i kam long tempol.

OL SAMTING WE OLI MEKEM MO KASEM LONG TEMPOL OLI TABU

Sapos yufala i ridim gud ol skripja, bae yufala i luk se Lod i no bin talemaot evri samting long evri pipol. I bin gat sam kwalifikesen we oli putum i stap blong wan i nid blong gat bifo hem i save kasem wan tabu infomesen. Ol seremoni blong tempol oli stap long sem laen ia.

Yumi no save tokbaot ol tempol odinens aotsaed long ol tempol. I no bin plan se, Save blong ol tempol seremoni ia, i letem nomo samfala man blong mas mekemsua se ol narafala man oli no save lanem ol samting ia. Yumi lukluk long narafala wei. Wetem bigfala hadwok, mifala i stap askem strong long evri sol blong oli kwalifae mo oli mekem olgeta i rere blong go long tempol mo tekem pat long wanem oli stap mekem insaed. Olgeta we oli bin go long tempol oli bin lanem wan stret tingting: Wan dei, evri sol we i stap laef mo evri sol we i bin laef long wol ia bae i gat janis blong harem gospel mo gat janis blong akseptem o sakemaot wanem nao tempol i stap givimaot. Sapos wan i sakemaot janis ia, hem we i sakemaot janis ia, bae i risponsibol long tingting ia.

Ol odinens mo ol seremoni blong tempol oli isi nomo. Oli naes. Oli tabu. Oli kipim olgeta i stap sef blong ol man we oli no rere blong go long tempol, oli no save kasem“ Blong gat fasin blong wantem luk o save samting, i no stret fasin blong rere. Sapos yufala i gat wan bigfala tingting blong wantem save abaot tempol, hemia tu, i no stret fasin blong rere. Blong rere

blong kasem ol odinens ia, i tekem wan blong hem i mas folem ol step ia: fet, fasin blong sakem sin, baptaes, konfemesen, stap klin inaf, wan fasin blong tingting i mas raep gud mo fasin blong gat bigfala respek, i stret long wan we oli invaetem hem olsem wan visita i go long haos blong Lod.

Yumi mas rere bifo yumi go long tempol. Yumi mas klin inaf bifo yumi go long tempol. I gat ol samting we yumi mas folem mo ol samting we yumi mas mekem. Lod i bin putum ol samting ia i stap be i no man. Mo, Lod i gat evri raet mo atoriti blong putum mo givim oda blong oli kipim ol mata we i abaot tempol i mas stap tabu mo konfidensiol.

Evriwan we i klin inaf mo i kwalifae long evri wei i save go insaed long tempol, mo long ples ia, bae oli soemaot long hem ol tabu tradisen mo odinens.

KLIN INAF BLONG GO INSAED

Taem taem ia i kam, we yufala i save gud olsem wanem tempol blesing i bigwan mo tu olsem wanem ol odinens we oli stap mekem insaed long tempol oli tabu tumas, bae yufala i no save kwestenem tumas ol hae standet we Lod i putum i stap blong yufala i save go insaed long tabu tempol.

Yufala i mas gat wan rekomen we i gud i stap blong save go insaed long tempol. Rekomen ia, bisop blong wod blong yufala mo presiden blong stek blong yufala i mas saenem. Long saed blong ol misin, i stret nomo, we branj presiden mo misin presiden blong yufala i gat risponsibiliti ia blong givimaot ol tempol rekomen long yufala. Olgeta we oli klin inaf nomo oli save go long tempol. Bisop i gat raet blong askem kwestin blong luk sapos yumi klin inaf. Intaviu ia i impoten tumas long yufala olsem wan memba blong Jos, from se hem i wan taem blong lukluk gud rod blong laef blong yufala wetem wan wokman blong Lod we oli odenem hem. Sapos i gat eni samting we i no stret long laef blong yufala, bae bisop i helpem yufala blong stretem. Tru long rod ia, taem yufala i stap kaonsel wetem wan man nomo blong jaj long Isrel, yufala i save talemaot o yufala i save kasem help blong putum yufala i klin inaf blong go insaed long tempol wetem raet blong Lod.

Presiden N. Eldon Tanner, we i bin stap sev olsem Fas Kaonsela long Fas Presidensi, i bin givim wan toktok long jeneral prishud miting long saed blong ol intaviu. Kaonsel blong hem i impoten tumas long tugeta, ol Jos lida we oli stap kondaktem intaviu mo blong ol memba we oli stap go tru long intaviu. Tingting gud long kaonsel ia:

Yufala ol bisop mo ol stek presiden, yufala i save statem wan intaviu blong wan tempol rekomen olsem ia:

“Yu bin kam blong luk mi blong kasem wan rekomen blong go insaed long tempol. Mi gat risponsibiliti ia blong ripresentem Lod long taem we bae mi stap intaviu long yu. Long en blong intaviu, i gat wan ples blong mi saenem rekomen blong yu; be signeja blong mi i no impoten tumas long rekomen blong yu. Bifo rekomen ia i gud, yu nao yu mas saenem rekomen yuwan.

“Taem yu saenem rekomen ia, yu mekem wan komitmen long Lod se yu klin inaf blong kasem ol samting we yu gat raet long hem we oli stap givim nomo long olgeta we oli holem wan rekomen olsem. I gat plante standet kwestin we bae mi askem.... Yu yu mas ones taem yu ansa long wanwan long olgeta kwestin ia.” . . .

Nao, afta we yu bin askem ol kwestin ia we yu mas askem long hem we i wantem rekomen, bae yu save talemaot wan samting olsem: “Wan we i stap go long haos blong Lod i mas fri long eni samting we *i no klin, i no tabu, i no stret evriwan, o fasin we i no stret.*” . . .

Ol intaviu blong yumi, yumi mas kondaktem wetem lav, long stret fasin. Plante taem bae yufala i save stretem ol samting sapos yufala i stap askem se: “ Sapos bae yu saenem rekomen blong yuwan, bae i gat wan tingting from wanem nao yu save filim se i no stret mo ating yu no ones wetem Lod?

“Yu ting se yu wantem sam moa taem blong stretem sam samting blong yuwan nomo bifo yu saenem tempol rekomen blong yu? Tingbaot se Lod i save evri samting, mo bae oli no save jikim Hem. Mifala i stap traem blong helpem yu. Neva giaman blong yu save kasem wan koling, wan rekomen, o wan blesing blong Lod.”

Sapos yu mekem intaviu long fasin we i stap antap ia, memba bae i gat risponsibiliti blong intaviu long hemwan. Bisop o stek presiden i gat raet blong gat paoa blong luksave samting. Bae hem i save sapos i no gat o sapos i gat wan samting blong stretem bifo hem i givim rekomen long yu. (“The Blessing of Church Interviews,” *Ensign* [Novemba 1978]: 42–43.)

Intaviu blong wan tempol rekomen i tekem ples long wan praevet fasin bitwin bisop mo Jos memba we i wantem rekomen. Long taem ia, bisop i askem ol kwestin we i abaot fasin blong memba ia, sapos hem i klin inaf, mo sapos hem i stap tru long Jos mo ol ofisa blong Jos. Memba ia i mas talemaot stret se hem i klin long tingting mo hem i stap folem Tok blong Waes, i stap pem ful taeting, mo i laef long fasin we i stret wetem ol tijing blong Jos, mo i no stap holem taet fasin blong joenem o agri wetem ol grup we oli go agensem ol bilif blong Jos. Bisop i kasem toksave finis se i impoten tumas we evri samting ia we memba bae i talem bae i stap konfidensiol.

Sapos ol ansa blong ol kwestin blong bisop i stret, hemia nao bae i talemaot sapos wan i klin inaf blong kasem wan tempol rekomen. Sapos wan memba i no stap biaen long ol komanmen, o i gat wan samting we memba i mas sakem sin from long laef blong hem, bae i gat nid se bae memba i mas soem se hem i sakem sin ia tru, bifo bisop i givim wan tempol rekomen.

Afta we bisop i kondaktem wan intaviu olsem, wan memba blong stek presidensi bae i mekem sem intaviu ia wetem wanwan long yumi we i wantem go long tempol. Sapos yumi stap go blong fastaem, bae stek presiden nao bae i kondaktem intaviu ia.

I stret, we taem yu go long wan intaviu blong wan tempol rekomen, bae yu akseptem jajmen blong hem we oli putum hem olsem jaj long Isrel, we hem i risponsibol blong ripresentem Lod blong talemaot sapos hem i stret o no blong yu go long tabu tempol ia.



Selestial Rum, Vernal Utah Tempol

FAS TAEM MO EVRI NARAFALA TAEM

Sapos yu stap go long tempol blong fas taem, hem i stret blong yu stap wari lelebet. Man i stap fraet oltaem long samting we hem i no save gud. Plante taem, yumi stap wari o fraet tumas long ol niu eksperiens.

Stap long pis. Yu stap go long tempol. Bae yu gat wan i stap blong helpem yu long evri ples long tempol. Bae oli lidim yu long fasin blong kea—stap long pis.

Taem yumi go insaed long tempol, yumi mas stap reveren. Taem yumi nid blong toktok, yumi mas mekem wetem sopsop voes o yumi mas wispa nomo. Long taem blong ol instraksen, hemia, yumi mas reveren evriwan mo yumi mas stap kwaet.

I gat sam ples nomo we oli stap givim janis blong tingting strong long kwaet fasin. Bifo yufala i go long sam tempol blong statem ol wok blong odinens, ol grup blong ol pipol we oli stap go long tempol bae oli kam wanples long japel blong bilding. Long ples ia, ol memba oli wet kasem taem ful grup i kam tugeta. Oltaem long laef, bae yumi no wantem stap wet. Blong yumi faswan long wan rum mo yumi mas wet long ol laswan blong oli kam bifo yu statem wan samting, bae i mekem yumi save harem nogud, sapos samting ia i stap tekem ples long wan ples we i no tempol. Insaed long tempol, hem i nara wei. Taem yu stap wet, hem i wan gudfala janis we i gud tumas. Hem i wan bigfala samting tumas blong save sidaon kwaet mo no storian, mo pulum tingting i go long ol tingting we i reveren mo oli long saed blong spirit! Hem i mekem sol i kam strong moa.

Taem yufala i kam long tempol, tingbaot se yufala i wan visita long haos blong Lod. Hem i wan taem blong glad, be wan glad we i kwaet. Samtaem, long taem blong ol tempol mared, i gat nid blong talemaot bakegen long ol famle mo ol fren se fasin blong olgeta blong soemaot lav mo kongratulesen blong olgeta, mo ol griting blong olgeta long ol memba blong famle we oli no bin luk olgeta longtaem, bae oli mas mekem long wan fasin we i kwaet evriwan mo i mas reveren evriwan. Fasin blong toktok bigwan mo laf bigwan i no gat ples blong hem insaed long haos blong Lod.

Akseptem ol daereksen blong olgeta we oli stap wok insaed long tempol. Bae i gat wan bae i stap lidim yufala taem yufala i stap gohed blong mekem ol wok insaed long tempol.

OL TIJING WE I KAM LONG HEM WE I HAE

Bifo yufala i go long tempol mo tu, afta we yufala i bin stap go plante taem, bae i helpem yu blong yu luksave se tijing we oli stap givim nomo insaed long tempol, oli mekem long fasin blong yusum ol saen. Lod, we i Masta Tija, i bin givim plante long ol instraksen blong Hem long fasin ia.

Tempol i wan bigfala skul. Hem i wan haos blong lanem samting. Long ol tempol, oli kipim samting insaed i stret oltaem blong mekem se i stret blong yumi kasem ol toksave long ol samting we i moa strong long saed blong spirit. Let Dr. John A. Widtsoe blong Kworom blong Olgeta Twelef Aposol i bin wan yunivesiti presiden we oli bin save gud long hem, mo tu wan man blong stadi we wol i save gud long hem. Hem i bin gat bigfala respek long wok blong tempol mo long wan taem hem i bin talem:

Tempol odinens i tekem ful plan blong sevem man, olsem we ol lida blong Jos oli stap tijim long wanwan taem, mo i mekem i klia sam long ol ples we i had blong andastanem. I no nid blong jenisim ol tijing blong tempol blong mekem se oli agri wetem plan blong sevem man. Tingting se endaomen i stret mo i fulwan, i stap olsem wan long ol bigfala toktok we i soem se ol tempol odinens oli tru. Antap long hem, ful riviui ia mo ful eksplenesen blong plan blong Gospel, i mekem tempol wosip, i wan long ol fasin blong mekem memori i kam klia long saed blong ful strakja blong gospel, i gud moa bitim ol narawan.

Wan nara tru samting we i kam long mi oltaem i wan strong pruf we i stap insaed we i soemaot we tempol wok i wan tru samting. Endaomen mo tempol wok olsem we Lod i bin talemaot long Profet Josef Smit...oli save divaedem long fo klia pat: Ol odinens blong mekem wan i rere; fasin blong givim ol toksave tru long ol lesen mo ol ripresentesen; ol kavenan; mo laswan, ol tes long saed blong save. Mi no ting se Profet Josef, we i no skul mo i no gat trening blong save tingting long samting, i save mekem evri samting ia



Ples blong Baptaes, Washington D.C. Tempol

we i stret evriwan, long tingting blong hemwan nomo. (John A. Widtsoe, "Temple Worship," *The Utah Genealogical and Historical Magazine* 12 [Eprel 1921]: 58.)

Blong talemaot bakegen toktok blong Elda Widtsoe:

Yumi stap laef long wan wol blong ol saen. Yumi no save wan samting, be tru long ol saen nomo. Yumi stap mekem smol mak long wan pis pepa, mo yumi talem se ol mak ia oli mekem wan wod, we i minim lav, o no lavem nating, o jareti, o God, o taem we i no save finis. Ating ol mak ia oli no naes nating taem yu luk long ae blong yu. I no gat wan i save faenem wan samting i rong wetem wan mak long ol pej blong buk from se oli no naes nating mo oli no impoten tumas olsem samting we oli ripresentem. Yumi no stap gat kwestin long saen ia G-o-d from se saen ia i no naes tumas, be yet hem i ripresentem olsem wanem nao God i hae tumas. Yumi stap glad blong gat ol saen, sapos nomo, oli talemaot klia mining blong olgeta long yumi. Mi toktok long yufala tedei long naet; yufala i no toktok tumas long fasin we mi bin givim toktok blong mi long yufala, o from ol toktok we mi bin yusum; taem yufala i bin stap folem ol mining blong ol tingting we mi bin traem blong mekem i klia long yufala, yufala i bin fogetem ol toktok mo ol fasin we mi bin yusum. . . .

Yumi stap laef long wan wol blong ol saen. I no gat man o woman we i save kamaot long tempol, mo i kasem endaomen blong hem olsem we hem i mas kasem, sapos hem i no bin luk, i go bitim saen ia, mo kasem ol tru mining o samting we ol saen ia oli ripresentem. ("Temple Worship," pej 62.)

Sapos yu stap gobak long tempol mo tingbaot se tijing insaed i gat mining blong ol saen, bae yu stap go oltaem wetem stret spirit mo bae yu kamaot wetem andastaning blong yu we i go longwe moa, bae yu filim se yu sef smol moa, se save blong yu i go antap moa long saed blong ol samting we i blong spirit. Plan blong tijing i gud tumas. Hem i kam tru long fasin we God i toktok long man. Lod Hemwan, we i Masta Tija, long tijing blong Hemwan, i bin tijim ol disaepol blong Hem wetem ol parabol, wan fasin blong toktok blong ripresentem ol samting tru ol saen we sapos

Hem i no bin yusum, bae i had blong andastanem. Hem i bin toktok abaot ol eksperiens blong evri man we Hem i bin tekem aot long ol laef blong ol disaepol blong Hem, mo Hem i bin tokabaot ol mama faol mo ol faol, ol pidjin, ol flaoa, ol red wael anamol, ol tri, ol stilman, ol stilman wetem masket, ol taem we san i go daon, rijman mo puaman, dokta, fasin blong somap klos we i brokbrok, pulum ol nogud gras, fasin blong klinim haos, fidim ol pig, seperetem ol sid, storem ol sid long ol fam, bildim ol haos, pem man blong help, mo plante nara samting. Hem i tokabaot sid blong wit, abaot perel. Hem i bin wantem tijim olgeta we oli bin stap lisin long Hem, mekem se Hem i bin tokabaot ol simpol samting long fasin blong yusum ol saen. I no gat wan samting abaot ol samting ia we i haed o i no kamaot gud, evriwan long olgeta oli ol saen we i gat mining blong ol.

Tempol hemwan i kam olsem wan saen. Sapos yufala i bin luk wan long ol tempol ia long naet taem, we evri laet blong hem i laet, bae yu luksave olsem wanem ples ia i bigwan tumas. Haos blong Lod we i swim long laet, i kamaot long tudak, i kam olsem saen blong paoa mo insperesen blong gospel blong Jisas Kraes we i stanap olsem wan laet long wan wol we i stap draon i go moa long tudak long saed blong spirit.

Bae yufala i no save andastanem fulwan abaot tempol seremoni long fas taem we bae yufala i go. Bae yufala i andastanem smol nomo. Gobak bakegen, bakegen mo bakegen. Gobak blong lanem samting. Ol samting we i bin mekem trabol long tingting blong yufala, ol samting we i mekem yufala i tingting o ol samting we i bin haed long yufala, bae yufala i kam blong save ol samting ia. Plante long olgeta bae oli ol kwaet samting, we i blong yufala wanwan nomo, we yufala i no save eksplenem gud long wan narawan. Be long yufala wanwan, oli ol samting we yufala wanwan nomo i save.

Wanem we yumi winim long tempol i dipen plante long wanem nao yumi stap tekem i go long tempol long fasin blong gat tingting i stap daon, fasin blong stap reveren mo fasin blong yumi blong wantem lanem wan samting. Sapos yumi letem oli tijim yumi, bae Spirit bae i tijim yumi, insaed long tempol.

Taem yufala i gat janis blong go long wan sesen blong endaomen long tempol, o blong witnesem wan siling, tingting longtaem abaot bigfala mining blong ol samting we yu stap luk i tekem ples long fored blong yu. Mo long ol dei afta long visit blong yu, rimemba mo tingting abaot ol samting ia long maen blong yu; long kwaet fasin mo wetem prea, luklukbak long olgeta mo bae yu luksave se save blong yu i go antap.

Wan long ol bigfala samting we i impoten abaot ol eksperiens blong tempol, hem i we hem i presentem longfala pikja we man i andastanem abaot ol stamba tingting blong God long saed blong wol ia. Taem yumi go long tempol (mo yumi save gobak mo mekem memori blong yumi i kam gud bakegen), ol samting we i tekem ples long laef i fit nomo insaed long plan blong sevem man. Yumi save luk gud se yumi stap wea, mo yumi save luk kwik taem tu taem yumi stap go aot long rod.

So lukluk i go long tempol. Soemaot tempol long ol pikinini blong yufala. Stat long dei we oli smol bebi, pulum tingting blong olgeta i go long tempol, mo stat blong rere long dei we bae oli save go long tempol.

Be taem yufala i stap wet se taem ia i kam, yufala tu, yufala i mas letem blong oli tijim yufala, stap reveren. Tingting strong mo winim evri samting we yu save tekem long ol tijing—ol bigfala tijing blong spirit we i kamaot long ol saen—we i stap nomo insaed long tempol.

Hem i tekem taem blong plan long wan tempol mared. I gat bigfala nid blong planem gud taem ia. Plante taem, ol yangfala kapol we oli lavem olgeta tumas, oli mekem tingting blong olgeta se bae oli mared mo oli mekem strong tingting, agensem toktok blong papa mo mama, se bae oli mas mared kwik taem nomo. Samtaem, yangfala kapol i tekem se toktok blong papa mo mama blong wantem tekem taem blong rere, i olsem se tufala i no agri long mared blong tufala. Oli fraet se sapos oli wet smol moa, bae i gat wan samting bae i kam krosem ol plan blong mared blong tufala. Sam yangfala kapol oli soem se oli no raep inaf mo oli no kaen nating taem oli stap fos blong oli mared kwik taem; mared ia oli stap mekem wetem plante hadwok mo plante taem i mekem se hem i no wan gudfala eksperiens we bae oli tingbaot long hem, be nomo, sapos oli bin mekem folem stret fasin blong hem.

Sapos oli hariap o fosem ol samting blong oli tekem ples, bae i gat olsem wan samting i no bin stap long fas taem we oli go visitim tempol, o long dei blong mared long tempol. Fas taem we oli go long tempol o siling long wan dei blong mared, hem i wan eksperiens we i hapen wan taem nomo long laef taem. Hem i nid blong rere gud long hem. Hem i impoten tumas, mo bae yumi no wantem se ol smol samting blong rere blong taem ia, olsem ol kakae, dekoresen mo nara samting blong lafet, bae i tekemaot tingting blong taem ia long tempol. From samting ia, oli mas mekem evri samting bifo dei ia. Sapos oli no mekem sam samting bifo dei ia, i save mekem man i harem nogud.

Sapos yufala i go long wan miting eli mo sidaon kwaet long japel mo lukluk ol man oli kam insaed long japel, bae yufala i luk se oli tekem wetem olgeta wan samting. Filing blong spirit i kam antap mo rum i jenis long wan empti rum i kam long wan kongregesen blong ol brata mo sista, we oli kam wetem tingting blong kasem wan samting long saed blong spirit.

Naoia, long ol dei we yumi stap bisi tumas, yumi no save mekem samting ia tumas taem yumi stap go long wan miting. Wanem we yumi stap winim long kaen fasin olsem bae i tu taem moa impoten taem yumi go long tempol. Hemia i tru tumas taem yumi stap go blong fas taem. Yumi mas go long tempol eli.

Olsem we yufala i save luk, taem yufala i go eli, i no blong protektem yufala nomo, blong mekem sua se ol rekomen blong yufala i stap long oda mo blong luk blong yufala i save go tru long niu eksperiens ia. Hem i moa long hemia. Hem i blong go long raet ples long taem blong stap long kwaet fasin wetem stret spirit—blong mekem yufala i rere long wanem bae i tekem ples.

Mifala i bin toktok plante long saed blong olgeta we bae oli tekem pat long eksperiens blong tempol, be i gat ol taem we oli planem wan mared long tempol mo sam memba blong famle we oli kolosap long yufala, bae oli no kwalifae blong kasem ol tempol rekomen. Ating hem i from papa mo mama blong man o woman we i konvet mo bae i mared, oli no memba yet blong Jos; o, oli niu tumas insaed long Jos blong oli save kwalifae blong gat wan tempol rekomen. O ating papa mo mama oli memba blong Jos be wan long olgeta i no laef inaf folem ol



Krisen Rm, Sol Lek Tempol

standet blong gospel blong hem i save kasem wan tempol rekomen. Ol smol samting ia i save kam olsem wan bigfala problem long ol taem blong mared long tempol. Hemia hem i ol taem we ol famle oli mas stap kolosap long olgeta, wan taem we oli mas kam wanples blong serem ol tabu taem ia blong laef. Taem oli holem taet tempol rekomen blong wan we i no kwalifae long hem, o blong no save invaetem wan fren o memba blong famle we i no memba blong witnesem siling, i save kam wan problem kwik taem. Hemia i save mekem ol man i no glad mo i save gat smol raorao long stret taem ia we i gat nid blong ol samting oli mas kwaet, blong evri samting i go gud.

Wanem nao bae yumi mas mekem long ol taem olsem? Wanem we yumi no mas mekem i blong fosem bisop. Bisop, folem standet blong hem we hem i mas holem olsem wan man nomo blong jaj long Isrel, i no save, wetem ones fasin, givim wan rekomen long wan we i no kwalifae blong gat wan. Sapos hem i mekem olsem, bae hem i spolem bigwan olgeta ia. Mo olsem bisop, bae i no stret blong mekem olsem long hemwan.

Taem oli putum wan taem blong wan tempol mared mo wan long ol papa mo mama o wan memba blong famle we i kolosap i no save go long tempol, sapos oli plan gud, bae taem ia i save kam olsem wan janis be i no wan problem. Lukluk long ol tingting ia. Invaetem papa o mama ia we i no memba, o memba we i no kwalifae long wan tempol rekomen blong kam long tempol wetem olgeta we bae oli witnesem mared. I gat wan spirit mo wan paoa long ol graon blong tempol we oli no save faenem long ol nara ples. Sam long ol tempol ia oli gat ol senta blong ol visita. Oli stap lukaotem gud tu ol graon blong tempol mo oli stap naes. Be oltaem hem i wan ples blong pis mo kwaet.

Mekem arenjmen blong wan i stap wet wetem memba blong famle ia. Bae yu no save lego man o woman ia i stap hemwan. I bin gat ol taem we sam memba blong famle we oli bin save go witnesem mared, oli bin glad blong spendem taem long ol graon blong tempol wetem olgeta we oli no bin save go witnesem mared. Long ples ia, raon long tempol, oli bin save eksplenem olgeta abaot strong tingting blong yangfala kapol blong sil insaed long haos blong Lod.

I gat wan bigfala paoa we i kamaot long taem ia we bae i no posibol sapos i no bin hapen olsem. Eksampol, long sam long


ol bigfala tempol, oli stap oganaesem ol tua. Taem oli mekem plan blong hem bifo taem blong hem i kam, i gat taem blong lukluk long ol spesel nid blong wan memba blong famle we i kolosap long yufala, be from wan samting o wan nara samting, i no save go insaed long tempol. Samtaem, papa mo mama we i no memba o we i no kwalifae, i save harem nogud tumas, mo taem oli lukluk long spesel nid blong hem, bae i save mekem tingting blong olgeta i go daon bigwan.

Long sam tempol, i gat wan spesel rum i stap blong olgeta we oli no kwalifae blong go insaed long tempol oli save stap long hem mo stap wetem wan we i kwalifae we i save ansarem ol kwestin blong olgeta.

Yangfala kapol ia i mas tingting we papa mo mama blong olgeta oli bin stap wet long dei ia ful laef blong olgeta. Tingting mo fasin blong olgeta blong wantem go long mared, mo filing we oli gat se bae i no save hapen, i wan saen blong lav blong papa mo mama we olgeta oli gat long tufala we i mared. Hem i no wan nogud filing we yangfala kapol i mas gat. Yangfala kapol i mas andastanem mo mekem gud mo stret plan from olsem pat blong mared blong tufala.

I gat sam taem we papa o mama we i no save go long tempol, i harem nogud mo i sem tumas mo bae tingting blong hem bae i save go daon. Long ol taem olsem yangfala kapol i mas mekem wanem samting nomo tufala i save mekem we bae i moa stret. Nao kwestin ia i save kam antap se: Be, olsem, bae yumi mared folem loa blong kantri nomo blong mekem se oli save witnesem mared, mo afta nomo bae yumi wet long stret yia bifo yumi go long tempol? Be hemia i no stret ansa. Long plante taem, sapos yufala i prea mo plan from, bae problem olsem i save jenis mo kam wan gud taem blong mekem famle i kam kolosap moa bitim taem bifo.

I no gud tumas blong invaetem ol bigfala grup blong ol fren, ol memba blong wod mo ol narawan blong witnesem wan mared. Ol grup blong mared oli gud taem oli smol nomo, mo i tekem ol memba blong tufala famle mo sam moa we oli kolosap long kapol we bae i mared. Long sam taem, oli stap anaonsem wan mared long wod se evriwan i mas traem blong givim sapot mo leftemap tingting blong kapol we i mared. Hemia ol memba oli mekem long taem blong lafet. Smol lafet blong mared i wan taem blong ol fren mo ol narawan we oli



Wan Pikja blong Rum blong Garen, Los Angeles California Tempol

wantem talem gudfala toktok long kapol oli kam long hem. Tempol mared hemwan i mas stap tabu mo oli serem taem ia wetem olgeta nomo we oli gat wan spesel ples long laef blong olgeta we oli mared.

Yumi no stap talemaot ol toktok blong siling odinens aotsaed long tempol, be yumi save tokbaot olsem wanem siling rum i naes, i kwaet mo i gat pis long spirit, mo i tabu tumas from ol tabu wok we oli stap mekem long hem.

Bifo ol kapol oli kam long olta blong siling odinens, hem i gudfala janis blong man we i lidim siling ia, blong i givim, mo blong yangfala kapol ia, blong oli kasem, sam kaonsel. Hemia sam long ol tingting we wan yangfala kapol i save harem long taem ia.

“Tedei, hem i dei blong yufala i mared. Ating yufala i stap glad tumas long ol filing we yufala i gat from mared blong yutufala. Oli stap bildim ol tempol olsem, olsem wan tabu ples blong ol odinens olsem mared o siling. Yumi no stap long wol ia. Ol samting blong wol oli no save mekem long ples ia, mo i no save gat paoa long ol samting we yumi stap mekem long ples ia. Dei ia i kam olsem dei we i moa impoten long laef blong yufala.

“Yutufala i bin bon, mo wan papa mo mama i bin invaetem yutufala long wol ia, mo tufala i bin rere long wan tabenakol blong laef ia, blong spirit blong yutufala i stap long hem. Wanwan long yutufala i bin baptaes. Baptaes, i wan tabu odinens, we i wan saen we yutufala i klinim yutufala, i wan saen blong ded mo laef bakegen long ded, i wan saen blong yutufala i kam fored long wan niufala laef. Hem, Hem i tekem fasin blong sakem sin mo fasin blong kam klin long ol sin. Sakramen i fasin blong riniu ol kavenan blong baptaes, mo yumi save, sapos yumi laef from, holem taet fasin ia blong kam klin long ol sin blong yumi.

“Yu, man, oli bin odenem yu long prishud. Fastaem, oli bin givim long yu Aronik Prishud mo ating yu bin gru antap tru long ol ofis we i stap—dikon, tija, mo pris. Nao dei ia i bin kam we yu bin klin inaf blong yu kasem Melkesedek Prishud. Prishud ia, we hem i prishud we i moa hae, oli talem se hem i prishud we i moa tabu bitim ol narawan we i folem tabu oda blong God, o hem i Tabu Prishud we i folem Oda blong Pikinini

ia blong God. (Luk long Alma 13:18 mo Hileman 8:18.) Oli bin givim yu wan ofis long prishud. Naoia yu wan elda.

“Wanwan long yutufala i bin kasem endaomen. Long endaomen ia, oli kavremap yu wetem sam paoa we i no save finis. Be long evri samting ia, long respek, oli bin givim long yufala bifo mo blong yufala i rere blong kam long olta blong oli silim yutufala olsem hasban mo waef blong taem long wol ia mo taem we i no save finis. Yutufala i kam nao olsem wan famle, mo yutufala i fri blong mekem ol samting insaed long kriesen blong laef, blong gat ol janis tru long fasin blong gat strong tingting long samting mo sakrifaes blong tekem i kam long wol ia ol pikinini mo lukaotem olgeta mo helpem olgeta long sef fasin tru long laef blong olgeta long wol ia; blong yufala i luk olgeta i kam wan dei, olsem we yutufala i bin kam, blong tekem pat long ol tabu odinens blong tempol.

“Yufala i bin kam long tingting blong yufala mo oli bin jajem se yufala i klin inaf. Yunion ia, Tabu Spirit blong Promes bae i save silim.”

Lod i bin talem se bae Hem i sendem wan nara Man blong Leftemap Tingting long yumi, ol fren blong Hem, blong Hem i save stap insaed long ol hat blong yumi. Man ia blong Leftemap Tingting i Tabu Spirit blong Promes, nara Man blong Leftemap Tingting we Hem i bin promes long ol disaepol blong Hem, olsem we i stap long testimoni blong Jon.

Man blong Leftemap Tingting ia i promes we Lod i bin givim yumi abaot laef we i no save finis, mo tu glori blong selestial kingdom. (Luk long D&C 88:3–4.)

“Blong yutufala i akseptem yutufala wanwan long kavenan blong mared i wan bigfala responsibiliti, i wan kavenan we i tekem wetem hem ol blesing we i no gat en.”

Ating bae woman mo man we i mared bae oli glad tumas long filing we tufala i gat long mared ia, mekem se bae oli no save lisin gud—ating bae oli no harem gud ol toktok blong siling odinens ia. Nomata yumi no save ripitim ol toktok ia aotsaed long tempol, yumi save gobak long sam taem blong witesem wan mared. Hem, Hem i wan Lod we i gud tumas we i letem yumi mekem olsem. Long ol taem ia, we yumiwan yumi no stap insaed long mared ia, yumi save lisin gud long ol toktok blong odinens ia. I semmak, taem yumi stap gobak

blong mekem ol wok ia long bihaf blong olgeta we oli bin ded finis, yumi save mekem maen mo spirit blong yumi i kam gud bakegen abaot eksperiens blong endaomen.

Sapos yutufala i bin mared fastaem long wan sivil seremoni, bae yutufala i wantem nao blong sil blong taem we i no save finis, mo, sapos yutufala i gat ol pikinini, mekem olgeta oli sil long yutufala long wan rilesensip we i no save finis. Sapos yutufala i kwalifae long hemia, bae i wan bigfala janis blong yutufala blong kasem blesing ia.

DRESAP LONG WAET

Taem yumi mekem ol odinens wok insaed long tempol, yumi werem ol waet klos. Klos ia i saen blong samting we i stret evriwan mo samting we i klin inaf mo samting we i klin evriwan.

Taem yufala i go insaed long tempol, yufala i jenisim ol klos blong yufala we yufala i stap werem evri dei i go long waet klos blong tempol. Yufala i jenis insaed long wan ples blong jenis insaed long tempol, mo wanwan long yufala i gat wan ples blong jenis mo wan kabod we i gat lok long hem mo i praevet evriwan. Insaed long tempol, tingting blong jenis stret i stap oltaem. Taem yufala i stap putum ol evri dei klos blong yufala insaed long kabod, yufala i lego tu ol kea mo ol wari mo ol samting we oli stap pulum tingting blong yufala i stap wetem ol klos ia. Yufala i kamaot long ples blong jenis ia, mo yufala i werem ol waet klos mo yufala i filim se yufala i wan mo i no gat wan narawan i moa hae o daon bitim yufala, from se evriwan we i stap raon long yufala oli werem waet klos tu.

Sapos yufala i stap go long tempol blong fas taem, toktok wetem bisop blong yufala. Taem hem i stap givimaot wan rekomen long yufala, bae hem i eksplenem long yufala long wanem kaen klos bae yufala i nidim long tempol. Blong kasem ol klos ia bae i no had long yufala. Yufala i save pem tru long Jos Distribusen Seves o, long sam ples, yufala i save rentem long tempol. Sapos yufala i rentem bae i gat wan smol fi nomo blong pem we bae i help long mane blong wasem ol klos ia. Long ol smol tempol, i no gat ol klos we oli save rentem.

Long saed blong ol seremoni mo odinens blong tempol, aotsaed long tempol yumi no stap tokbaot tumas abaot ol klos

we yumi stap werem insaed. Yumi save talem nomo se, olsem ol seremoni, ol klos ia oli gat mining blong olgeta.

Hem i wan fasin blong soem respek mo stap reveren we taem memba blong Jos i visitim tempol mo i dresap mo i mekem hem long wan wei we sapos Lod i stap, bae hem i no harem nogud long hemwan. Tingting se, sapos oli invaetem yufala i go long haos blong wan bigfala lida we oli stap respektem hem. Bae oli talemaot long yufala tu se long taem ia, bae yufala i miks wetem ol nara man tu we oli save gud olgeta, mo olgeta tu oli kasem sem invitesen ia. Invitesen ia finis i minim se oli stap lukluk long yufala olsem wan we oli save gud yufala mo oli gat respek long yufala. Bae yufala i luksave se plante moa bae oli wantem tumas blong kasem sem invitesen ia olsem yufala, be from wan samting oli no bin invaetem olgeta mo oli no save kam. Long ol taem olsem, mi no ting se bae yufala i go long invitesen ia wetem ol olfala klos o bae yufala i putum klos olbaot nomo. Mi no ting tu se bae wan man bae i no sevem mustas blong hem, o wan woman bae i no save mekem gud hea blong hem.

Olgeta pipol we oli gat respek mo gud fasin, taem oli kasem invitesen olsem blong wan impoten kakae, oltaem bae oli mas askem fastaem wanem kaen klos bae i stret blong werem long taem ia. Olsem wanem long yufala, bae yufala i no rere gud long wan taem olsem? Ating long ol taem olsem bae yufala i go pem ol niu klos blong mekem se wei we yufala i luk bae i no spolem spesel taem ia.

Bae yufala i soem tu se yufala i kea taem yufala i aeanem mo klinim gud ol klos blong yufala. Bae yufala i harem nogud sapos yufala i no dresap gud.

Bae yufala i save komperem visit blong yufala long tempol i olsem taem yufala i kasem invitesen ia.

I gat wan taem nomo we ol memba blong Jos oli save go insaed long tempol wetem ol klos blong olgeta we oli werem oltaem, mo hemia, hem i taem oli go blong witnesem wan tempol mared. Long taem ia nomo, oli karemaot sus blong olgeta, mo oli werem ol waet sus. Plante yia i pas finis, ol brata blong Jos oli bin givim raet blong oli save mekem olsem blong ol memba blong famle o ol fren we oli no save go tru long endaomen sesen bifo long mared.



Terrestrial Room, Sol Lek Tempol

Ol woman mo ol man we bae oli mared oli go insaed long tempol blong mared blong laef ia mo taem we i no save finis. Ol woman we oli mared oli werem ol dres wetem longfala han, kaliko blong hem i naes, mo i no gat tumas samting i flasem. Ol man we oli mared, olgeta tu oli werem waet klos. Ol brata we oli kam blong witesem ol mared oli no save werem ol sut (blak kot).

Mifala i bin sapraes tumas mo mifala i harem nogud smol long sam taem, blong faenem se sam we oli kam blong witesem ol mared o blong atendem wan sesen, taem oli kam long tempol, oli stap dresap olsem se oli stap go long wan piknik o oli go long spot.

Janis ia we yumi gat blong save go long tempol i nidim blong yumi mekem moa bitim hemia. Lod i glad tumas sapos yumi save swim mo putum ol klin klos, nating klos ia i no sas. Yumi mas dresap long wan wei we bae yumi save go tu long sakramen miting o long wan invitesen we i stret mo i gat respek long hem.

I bin gat ol taem we wan we i bin kam blong witesem wan mared i no bin tingting nating long ol toktok we ol Brata oli bin givim long saed blong dresap mo olsem wanem blong mekem gud yuwan, blong olsem wanem blong lukaot blong no folem tumas eksampol blong wol mo no werem ol klos we oli no gat respek, mo katem gud hea mo mekem gud hea, mo sam moa. Mifala i bin stap tingting se olsem wanem nao, wan bae i no tingting kwik taem mo bae i no gat inaf filing blong save se Lod bae i no glad nating long olgeta we oli soem se oli wantem blong folem ol wei blong wol ia.

Olsem wanem wan memba i save go long tempol mo i werem ol klos we i no stret nating mo i folem ol fasin blong wol ia? Olsem wanem wan bae i no save mekem gud hea blong hem blong i soem gud fasin mo respek?

Taem yufala i gat ol janis blong tekem pat long ol seremoni blong tempol o blong witesem wan siling, tingbaot se yufala i huia. Yufala i wan visita insaed long haos blong Lod. Yufala i mas mekem gud yufala mo werem klos long wei we bae yufala i harem gud sapos Man we i invaetem yu i kamaot long yufala.

Olgeta we oli holem mo serem ol blesing blong prishud, oli mas kavremap gud ol bodi blong olgeta olsem we oli bin

talemaot long Profet Josef Smit long taem we hem i kasem endaomen blong hem long endaomen seremoni.

Ol memba we oli bin risivim ol odinens blong tempol, oli stap werem wan spesel gamen o klos afta long hem. Ol gamen oli kam long wan oganaesesen blong Jos—mo ol memba oli save kasem ol gamen ia tru long distribusen program we Jos i lukaotem.

Gamen i ripresentem ol tabu kavenan. Hem i leftemap tingting blong dresap gud mo i kam olsem wan aean o wan proteksen long hem we i werem klos ia.

Taem ol memba oli werem gamen ia, i no minim se oli nomo save werem ol klos we i folem ol stael we plante man long evri nesen long wol oli stap werem. Ol klos nomo we i no stret o stael blong olgeta i no gat respek long hem, oli no stret blong werem wetem gamen. Eni memba blong Jos, we hem i bin go long tempol o i no bin go yet, wetem stret spirit, bae i no wantem blong werem ol klos we oli no stret evriwan, o stael blong olgeta i no gat respek long hem.

I gat plante taem we ol memba blong Jos oli fesem ol kwestin abaot gamen.

Long wan taem, i bin gat long ol brata blong Jos we oli bin invaetem hem blong hem i givim wan toktok long skul mo ol wokman blong Trening Skul blong Ami blong Solwota blong Amerika we i stap long Newport, Rhode Aelan. Wetem ol man we oli bin stap lisin long taem ia i bin gat tu sam hae man blong long saed blong Katolik, Protestan, mo ol Jiu.

Long taem blong kwestin mo ansa, wan long olgeta ia i askem, “Yu save talem smol long mifala long saed blong spesel klos we ol sevesman blong ami we oli Momon oli stap werem?” Long kwestin ia, man ia i wantem askem olsem “From wanem yufala i stap mekem olsem? I no strenj lelebet? Hemia i no wan problem?”

Long man ia we i bin aksem kwestin ia, brata blong Jos i ansa wetem wan kwestin: “Yu yu ripresentem wanem Jos?” Mo man ia i talemaot nem blong wan blong ol Protestan Jos.

Brata i gohed i talem, “Long laef blong yu aotsaed long ami mo tu taem yu stap lidim ol miting insaed long ami seves, yu werem ol klos we i no soem se yu yu man blong Jos, hemia i tru?” Man ia i se, yes samting ia i tru.



Selestial Rum, Columbia River Washington Tempol

Brata blong Jos i gohed i talem: “Mi ting se hemia i impoten long yu long wei we hemia i mekem se yu yu defren long kongregesen blong yu. Hem i yunifom blong yu, long wan wei, we i tokbaot ministri. Mo mi ting se yunifom blong yu i gat wan moa bigfala mining; Hem i rimaenem yu se yu yu huia mo wanem nao ol wok blong yu mo ol kavenan blong yu. Hem i wan samting we i mekem se oltaem, yu tingbaot se yu yu wan man blong jos, mo se yu luk yuwan olsem wan wokman blong Lod, mo yu nao yu risponsibol blong laef long wan laef we bae yu klin inaf long odinesen blong yu.”

Brata blong Jos i talem long olgeta evriwan: “Yufala i mas save andastanem nao wan risen from wanem nao ol Lata-dei Sent oli gat wan bigfala komitmen long saed blong gamen. Wan bigfala samting we i defren bitwin Jos blong yufala mo Jos blong mifala hem i we, mifala i no gat ol wokman we oli stap pem olgeta long wok blong Lod. Ol lokol lida oli prisaed long ol kongregesen. Oli ol man we oli gat ol defren wok long laef. Yet oli odenem olgeta long prishud. Oli holem ol ofis insaed long prishud. Oli setem olgeta apat long ol prisaeeding posisen olsem ol presiden, ol kaonsela, mo ol lida blong ol defren level. Man we i stap lidim kongregesen blong mifala long Sandei olsem bisop, i save go long wok long Mandei olsem wan wokman blong post-ofis, wan man we i wok long ofis, wan fama, wan dokta; o hem i save stap long ami blong ea o solwota. Folem standet blong mifala hem i wan minista we oli odenem hem semmak olsem yu stap folem ol standet blong yufala. Long fasin ia, plante long ol kavman oli luksave hem. Mifala i tekem ol sem benefit long spesel klos ia i semmak long yufala long ol klos blong yufala. Wanem i defren, i nomo we mifala i werem klos ia andanit long ol klos we mifala i werem evri dei, from se mifala i stap wok long ol defren ples antap long wok blong mifala insaed long Jos. Ol samting we oli tabu, mifala i no wantem stap displei long hem long fored blong wol.”

Afta long hemia, brata blong Jos i eksplenem se i gat ol bigfala mining long saed blong spirit we i go wetem klos ia, we i joenem fasin blong werem gamen wetem ol kavenan we oli stap mekem long tempol. Bae i no nid blong yumi tokbaot ol samting ia—i no from se oli sikret, hem i bin ripitim, be from nomo oli tabu.

Gamen, we i kavremap bodi, hem i wan samting we yufala i save luk mo holem mo i mekem yufala i tingbaot ol kavenan ia. Blong plante memba blong Jos, gamen i bin stap olsem wan proteksen taem hem i fesem ol temptesen. Mo long plante samting, hem i stap olsem saen blong bigfala respek we yumi gat long ol loa blong God—wan long olgeta hem i standet blong gud fasin mo tingting.

PAOA BLONG SILIM

Sapos yumi wantem andastenem histri mo doktrin blong wok blong tempol, yumi mas andastanem fastaem wanem nao hem i paoa blong silim. Yumi mas luk long ol tingting blong yumi, i go longwe lelebet, blong luk se from wanem nao i impoten tumas blong gat ol ki blong atoriti blong yusum siling paoa.

Kolosap naen handred yia bifo Kraes i bon, profet Elaeja i kamaot long kot blong king blong Isrel; Hem i bin holem wetem hem wan tabu atoriti: paoa blong silim.

Elaeja i bin wok long ministri blong hem, i bin odenem mo anoentem Elaesa blong i kam afta long hem, mo afta long hemia—mo hemia i impoten tumas—hem i no bin ded. Olsem Moses bifo long hem, hem i jenis i go.

Afta long hemia, nem blong hem i kamaot wan taem nomo long Ol Testeman, long las ves blong las japta blong Ol Testeman. Long ples ia Malakae i talem profesi se Elaeja bae i kambak mo bae hem i kambak blong “mekem we ol papa wetem ol pikinini blong olgeta we oli stap seraot, oli joen bakegen, oli stap gud” sapos no bae hem i spolem gud wol ia. (Luk long Malakae 4:5–6.)

Nao Jisas i kam kasem eria blong taon ya Sisaria Filipae, mo long taem ya hem i askem long ol man blong hem se ‘Ol man oli stap tokbaot mi, mi Pikinini blong Man, se mi hu?’

Nao oli talem se, ‘Sam man oli stap talem se yu yu Jon Baptaes, mo oli stap talem se yu yu Profet Elaeja. Mo sam narafala man oli stap talem se yu yu Profet Jeremaea no wan long ol profet bifo.’

Nao hem i askem long olgeta se ‘Be yufala, yufala i stap tokbaot mi, se mi hu?’

Nao Saemon Pita i talem se 'Yu yu Mesaea ya. Yu yu Pikinini blong God ya we i laef, i stap we i stap.'

Nao Jisas i talem long hem se, 'Saemon, pikinini blong Jon, yu yu save harem gud, from we i no man we i soemaot samting ya long yu. Papa blong mi long heven, hem nomo i soemaot long yu.'

Mo mi mi talem long yu, se yu Pita, we i min se ston. Mo bambae mi mi stanemap jos blong mi long ston ya, mo paoa blong ded bambae i no naf blong winim jos ya.

Bambae mi givim long yu, ol ki blong niufala wol ya we God i king long hem. Nao wanem samting we yu yu blokem long wol ya, bambae God we i stap long heven, hem tu bambae i blokem, mo wanem samting we yu yu letem long wol ya bambae hem tu i letem olsem. (Matiu 16:13–19.)

Taem Pita, Jemes, mo Jon i bin go wetem Lod long Bigfala Hil, long taem ia i bin gat tu man i kamaot wetem Lod we i bin go finis. Oli bin luksave olgeta olsem Moses mo Elaeja, we i bin kam blong givim long presidensi ia, paoa blong sil. (Luk long Matiu 17:1–8.)

Pita nao i bin holem ol ki ia. Pita nao blong holem siling paoa ia, atoriti ia we i tekem paoa blong joenem o silim long wol o blong lusum long wol mo bae i olsem tu long ol heven.

Long yia 34 afta Jisas Kraes i ded, afta we oli bin nilim Hem long kros, Lod i bin minista long ol Nifaet. Hem i talemaot long olgeta—mo hemia i gud tumas long histri blong ol skripja—long tufala las japta blong Malakae (we i gat profesi se bae Elaeja bae i kambak), i bin talemaot long olgeta blong oli raetem, mo afta i bin tijim gud olgeta.

Taem Enjel Moronae i bin kamaot long Profet Josef Smit blong talemaot long hem abaot ol plet, hem i tokbaot profesi blong Malakae se bae Elaeja bae i kambak bakegen. Toktok ia i stap long nambatu seksen blong buk ia Doctrine and Covenants.

Tetin yia afta we Moronae i bin kamaot, oli bin bildim wan tempol i stret long tingting ia, mo Lod i kamaot bakegen mo Elaeja i kam wetem Hem mo i givim ol ki blong siling paoa.

Ol ki ia oli blong Presiden blong Jos—blong profet, sia, mo reveleta. Tabu siling paoa ia i stap wetem Jos naoia. Olgeta we oli save gud mining blong atoriti ia oli lukluk long hem wetem

bigfala tabu respek. I no gat wan samting moa oli lukaotem gud. I gat sam man nomo we oli holem siling paoa ia long wol long eni taem—long wanwan tempol i gat ol brata we oli bin givim siling paoa ia long olgeta. I no gat wan i save kasem be tru long profet, sia, mo reveleta mo Presiden blong Jos blong Jisas Kraes blong ol Lata-dei Sent o long olgeta we hem i bin givim raet long olgeta blong oli givim i go long ol narawan.

“MIFALA I BIN LUK LOD. . . .”

Dei we Elaeja i bin kambak i bin long wan Sandei aftenun, long 3 Epril 1836. Oli bin gat wan sakramen miting insaed long Kirtland Tempol. Profet i tokbaot aftenun ia long ol simpol toktok ia:

Long aftenun, mi bin helpem ol nara Presiden blong serem Lod Sapa long Jos, we i kam long Olgeta Twelef, we long dei ia oli bin gat janis blong stanap long tabu tebol. Afta we mi bin mekem wok ia long ol brata blong mi long Jos, mi bin go bak long pulpit, ol vel oli bin kam daon, mo mi bo daon, wetem Oliva Kowdri, long wan bigfala be saelen prea. Profet i bin rekodem se afta we hem mo Oliva Kowdri oli stanap afta long prea ia, visen ia nao i bin kamaot long tufala tugeta. (Luk long D&C 110, introduction.)

Vel i bin kamaot long ol maen blong olgeta, mo ol ae blong andastaning i bin open.

Oli bin luk Lod we i bin stanap andap long pulpit we i stap long fored blong olgeta, mo andanit long leg blong hem i bin gat wan samting we oli wokem long tru gol mo i kala blong hem i braon smol.

Ol ae blong Hem i olsem faea, hea blong Hem i waet olsem klin sno, bodi blong Hem i saen bitim san, mo voes blong Hem i olsem ol bigfala wota we oli ron, i olsem voes blong Jehova.

Lod i bin talem se Hem i Faswan mo Laswan, Hem we i laef i stap, Hem we oli bin kilim Hem i ded. Hem i toktok from yumi long Papa.

Hem i bin talem long olgeta se Hem i bin fogivim sin blong olgeta mo oli bin stap klin long fored blong Hem; nao, tufala i mas glad.



Selestial Rum, Sol Lek Tempol

Hem i bin talem se evri pipol blong hem we i bin bildim haos ia long nem blong Hem, oli mas glad.

From se Hem i bin akseptem haos ia, mo nem blong Hem bae i stap ia, mo bae Hem bae Hem i kamaot long ol pipol blong Hem long haos ia wetem fasin blong sore.

Hem i bin talem se bae Hem i kamaot long ol wokman blong Hem mo toktok long olgeta long voes blong Hemwan sapos ol pipol blong Hem bae oli stap biae long ol komanmen blong Hem mo no spolem tabu haos blong Hem.

Hem i bin talem se ol hat blong plante plante taosen pipol bae oli glad tumas from ol blesing we bae i kamaot mo from endaomen we ol wokman bae oli endao long hem long haos ia.

Hem i bin talem se bae ol ples ovasi bae oli save gud long haos ia mo hemia bae i bigining blong ol blesing we bae i kamaot long ol pipol blong Hem.

Afta we visen ia i bin klos, ol heven i bin open bakegen long Josef Smit mo Oliva Kowdri. Moses i bin kamaot long tufala mo i bin givim long tufala ol ki blong mekem Isrel, long ol fo pat blong wol, oli kam wan mo blong lidim ol ten traeb i kam long graon long not.

Afta long hemia, Elias i bin kamaot mo givim long han blong olgeta dispensesen blong gospel blong Ebrahim, mo i bin talem se long olgeta mo laen blong olgeta, evri jeneresen bae oli gat blesing.

Afta we visen ia i bin klos, wan nara bigfala mo hae visen i bin kamaot long tufala, from Elaeja, hem we i profet, we oli bin tekemaot hem be hem i no bin save ded, i bin stanap long fored blong tufala.

Hem i bin talem se taem i bin kam, we Malakae i bin tokbaot, we bae oli sendem hem bifo bigfala mo nogud dei ia blong Lod.

Hem i bin kam blong tanem hat blong ol papa i go long ol pikinini, mo blong ol pikinini i go bak long ol papa blong mekem se wol ia bae oli no spolem hem.

Hem i bin talem se ol ki blong dispensesen ia, hem i putum long han blong tufala. Wetem hemia bae tufala i save se bigfala mo nogud dei blong Lod i stap kolosap, mo tu i stap long ol doa nomo. (Luk long D&C 110:1–16.)

Hem i tekem ples finis! Saen blong taem ia i bin kamaot mo wol i no bin luk, be bae i save jenisim wei blong evri sol we i bin laef o bae i laef long wol. Ol samting oli bin stat blong tekem ples sloslo. Jos i kam wan jos blong bildim ol tempol.

Long wanwan taem long wol, i gat, wanem we man i ting se i tekem ples kwik taem, sam pipol mo oganaesesen mo ol sosaeti we i gat intres blong faenem laen blong ol man. Fasin i stap tekem ples stat long taem we Elaeja i bin kamaot long Kirtland tempol.

Stat long dei ia, 3 Epril 1836, ol papa wetem ol pikinini blong olgeta oli stat blong joen. Afta long hemia, ol odinens ia i no blong sot taem nomo be blong i stap oltaem. Siling paoa i bin stap wetem yumi. I no gat eni nara paoa o atoriti i go bitim siling paoa ia. Paoa ia i givim mining long ol odinens, blong olgeta we oli laef mo olgeta we oli ded, we oli mekem wetem stret atoriti mo i mekem olgeta i stap blong taem we i no save finis.

OLI MEKEM EVRI SAMTING LONG ODA

Folem ol bigfala samting we i bin tekem ples long Kirtland Tempol, ol hadtaem mo ol nogud fasin blong ol man i mekem ol Sent oli mas muvaot. Long eni ples we oli stap long hem, Lod i bin soemaot ol plan blong bildim ol tempol. Hemia i bin tekem ples long ol ples we oli singaotem Independence mo long Far West, Missouri. Long taem ia, ol nogud fasin blong man i kam strong long ol Sent mo afta oli bin ronwe i go long Nauvoo, Illinois. Long ples ia revelesen i bin kam bakegen wetem komanmen blong oli mas bildim wan haos blong Lod.

Lod i bin eksplenem se tingting blong bildim haos ia i blong Hem i talemaot ol odinens. Hem i bin talem se oli mas bildim tempol ia long nem blong Hem, blong Hem i save talemaot ol odinens blong Hem long ol pipol blong Hem insaed long haos ia. Bae Hem i talemaot long Jos blong Hem ol samting we i bin haed i stap stat long bigining blong wol ia, ol samting we i abaot dispensesen blong ol las dei. (Luk long D&C 124:40–41.)

Hem i bin talemaot se tempol bae i wan ples blong ol memba blong Jos oli kondaktem ol anoenting, fasin blong kam klin, ol baptaes blong olgeta we oli ded, ol tabu miting, mo ol seremoni blong tingbaot ol sakrifaes blong olgeta we ol boe blong Livae i bin mekem. (Luk long D&C 124:39.)



Celestial Room, San Diego California Tempol

Long ol odinens we yumi stap mekem long Jos i gat: baptaes, sakramen, givim nem mo blesing blong ol pikinini, givim blesing long ol sikman, setem apat ol pipol long ol koling insaed long Jos, odenem ol man i go long ofis blong prishud. Antap long olgeta i gat ol odinens we i hae moa, we oli mekem insaed long ol tempol. Olgeta ia i tekem, fasing blong kam klin, anoenting, endaomen, mo siling odinens, we plante taem oli stap tokbaot olsem tempol mared.

Olsem wanem nao ol odinens ia oli impoten long yumi ol memba blong Jos?

Yu save glad, yu save sef, yu save kam olsem god sapos yu no kasem olgeta? Ansa: i gud blong yumi kasem olgeta, o yumi wantem kasem olgeta, o tu i nid blong kasem olgeta. I no nid nomo blong kasem olgeta be nid ia i moa bitim hemia. Oli impoten tumas long wanwan long yumi, yumi *mas* kasem olgeta.

Profet Josef Smit i bin talem se plante taem oli bin stap askem kwestin ia long hem:

“Bae yumi save sef nomo sapos yumi no stap go tru evri odinens ia, mo ol narawan?” Bae mi stap ansa, No, bae yufala i no save sef fulwan. Jisas i bin talem, “Long haos blong Papa blong mi, i gat plante rum i stap. Naoia bambae mi mi go mekem rere ples blong yufala.” *Haos* long ples ia, i gud blong transletem olsem kingdom; mo eni man we i kam olsem God long ples we i moa hae i mas laef folem selestial loa ia, mo ful loa tu. (*History of The Church of Jesus Christ of Latter-day Saints*, ed. B. H. Roberts, 7 vols. [Salt Lake City: The Church of Jesus Christ of Latter-day Saints, 1949], 6:184.)

Presiden Joseph Fielding Smith i bin talem:

Mi no wantem save se yu stap long wanem ofis insaed long Jos ia, yu save stap olsem wan aposol, yu save stap olsem wan petriak, o eni narawan, be yet, yu no save kasem ful prishud sapos nomo yu go insaed long tempol blong Lod mo kasem ol odinens we profet i stap tokbaot. I no gat man i save kasem ful prishud aotsaed long tempol. (Joseph Fielding Smith, *Elijah the Prophet and His Mission* [Salt Lake City: Deseret Book Co., 1957], pej 46.)

Mifala i bin tokbaot fastaem abaot ol odinens we oli stap mekem insaed long tempol. Hemia i tekem tu endaomen. Blong endao hem i blong mekem wan i kam rij, blong givim long narawan wan samting we bae i stap mo i bigwan moa. Ol endaomen tempol odinens oli mekem wan i kam rij long 3 fasin: (a) Hem we i kasem odinens ia i kasem paoa we i kam long God. "Olgeta we oli kasem ol odinens blong endaomen oli endao wetem paoa we i kam antap." (b) Hem we i kasem endaomen i endao tu wetem infomesen mo save. "Oli" kasem wan edukesen long saed blong ol stamba tingting mo ol plan blong Lod." (Bruce R. McConkie, *Mormon Doctrine*, 2nd ed. [Salt Lake City: Bookcraft, 1966], pej 227.) (c) Taem hem i sil long olta, wan man o woman i stap kasem ol blesing, paoa mo ona we i gat glori long ol olsem pat blong endaomen blong hem.

I gat tu (2) mining o wei blong tokbaot endaomen, mo faswan Presiden Brigham Young i bin givim:

Bae mi givim yufala wan sot mining. Endaomen blong yu, i blong yu kasem evri odinens ia insaed long Haos blong Lod, we yu nid blong kasem, blong taem yu lego laef ia long wol, bae yu save wokbaot i gobak long ples we Papa i stap long hem, mo bae yu save pas long fored blong ol enjel we oli stanap olsem ol bodigad, mo givim olgeta ol ki toktok, ol saen, ol token long saed blong tabu Prishud, mo kam olsem God blong taem we i no save finis nating long wol mo hel. (*Discourses of Brigham Young*, comp. John A. Widtsoe [Salt Lake City: Deseret Book Co., 1971], pej 416.)

Elda James E. Talmage i bin tokbaot endoamen olsem:

Tempol Endaomen, olsem we oli stap givimaot long ol tempol blong tedei, i tekem ol instraksen we i abaot mining mo olsem wanem ol dispensesen we oli pas i bin kamaot, mo tu olsem wanem nao taem blong tedei i taem we i moa impoten mo hem i moa bigwan bitim eni bigfala taem long histri blong man. Ol toksave ia i tekem taem blong tokbaot ol bigfala taem blong taem oli krietem wol ia, olsem wanem long fas papa mo mama blong yumi long Garen blong Eden, taem we oli no bin obei mo taem oli bin aot long naesfala ples ia, kondisen blong tufala long wol ia taem oli bin talemaot long tufala blong laef long wok mo swet blong tufala, plan blong pemaot yumi we tru long hem yumi save

kam klin long ol sin, bigfala taem blong apostasi, taem gospel i bin kambak wetem ol paoa mo gud samting blong hem, fasin blong mas stap klin evriwan mo givim taem mo tingting long wanem we hem i stret long laef blong yumi naoia, mo blong mas folem evriwan, wanem we Gospel i talem yumi blong mekem. (James E. Talmage, *The House of the Lord* [Salt Lake City: Bookcraft, 1962], ol pej 99–100; we afta oli singaotem *The House of the Lord*.)

Toktok ia blong Elda Talmage i mekem i klia we taem yufala i kasem endaomen blong yufala, bae yufala i kasem ol toksave long saed blong stamba tingting mo ol plan blong Lod long saed blong kriesen blong man mo fasin blong mekem man i kam long wol. Bae oli tijim yufala wanem nao bae yufala i mas mekem blong yufala i kam olsem God.

I gat nid blong kasem ol blesing blong endaomen blong kam olsem God. Evri Lata-dei Sent i mas lukaot blong stap klin inaf long blesing ia mo blong kasem blesing ia.

Ol odinens blong wasing mo anoenting, oli tokbaot olgeta insaed long tempol olsem ol odinens blong mekem yufala i rere. Bae i stret nomo blong talemaot naoia se: Fasin blong kam klin mo anoenting i go wetem endaomen—mo oli gat plante mining long saen, be i gat sam stret promes, mo ol blesing we i kam i no long taem afta be tu ol blesing we i kam long fiuja.

Wetem ol odinens ia, insaed long tempol, bae yufala i werem gamen mo bae oli promesem plante gudfala blesing we i go wetem. Hem i impoten tumas blong yufala i mas lisin gud taem oli stap givim ol odinens ia long yufala mo blong yu mas traem blong tingbaot ol blesing we oli bin promesem mo ol kondisen we yufala i mas folem blong kasem olgeta.

Siling odinens i odinens ia we i joenem ol famle blong taem we i no save finis. Tempol mared i wan siling odinens. Taem wan kapol i sil long tempol folem wan sivil mared, ol pikinini we oli bin bon bifo long siling oli no bon insaed long kavenan, mo bae oli silim olgeta long tufala long wan odinens we i sot mo i tabu.

Plis, mekem sua se laef blong yufala i stap long oda evriwan. Hemia i kam nomo taem yufala i stap kasem ol tempol blesing, ol odinens blong yufala, from se paoa we i olsem God i stap kamaot long ol odinens ia (luk long D&C 84:20).

OL TABU KAVENAN

Lod, long revelesen we yumi save naoia olsem seksen 132 long buk ia Doctrine and Covenants

I stap talemaot wan kavenan we i niu mo i stap oltaem. Hem i bin talem se sapos yumi no obei long komanmen ia, bae yumi kasem panismen from se i no gat wan i save sakemaot kavenan ia mo gat raet blong kam long glori blong Hem.

Evriwan we i wantem wan blesing long Lod i mas obei long loa mo ol kondisen we oli putum blong kasem blesing ia, olsem we i bin stap bifo oli bin mekem wol ia (luk long D&C 132:4–5).

Presiden Joseph Fielding Smith i stap tokbaot kavenan ia we i niu mo i stap oltaem long ol toktok ia :

Wanem nao hem i kavenan we i niu mo i stap oltaem? Mi sori blong talem se i gat sam memba blong Jos we oli folem sam tingting we i no stret mo oli no gat stret infomesen blong wanem stret hem i kavenan ia we i niu mo i stap oltaem. *Kavenan ia we i niu mo i stap oltaem hem i wanem we i kamaot long evri gospel kavenan mo samting we wan i mas mekem long saed blong gospel.* (Joseph Fielding Smith, *Doctrines of Salvation*, 3 vols. [Salt Lake City: Bookcraft, 1954–56], 1:156; we oli singaotem afta olsem *Doctrines of Salvation*.)

Kavenan ia i tekem tugeta evri odinens blong gospel—mo hemia we i moa hae oli mekem insaed long tempol. Blong talemaot bakegen toktok blong Presiden Smith:

Naoia i gat wan klia toktok we i tokbaot stret kavenan ia we i niu mo i stap oltaem. *Hem i evri samting—gospel we i fulwan.* Mekem se mared we oli mekem long stret fasin, baptaes, odinens long prishud, evri nara samting—*evri kontrak, evri wok, evri samting we oli mekem long saed blong gospel blong Jisas Kraes, we Tabu Spirit blong promes i silim folem loa blong hem we hem i bin givim, i pat blong kavenan we i niu mo i stap oltaem.* (*Doctrines of Salvation*, 1:158.)

Lod i bin talemaot long ol klia toktok we i no gat mistek long hem se i no gat wan i save sakemaot kavenan ia mo i gat

raet blong go insaed long glori blong Hem (luk long D&C 132:4).

Olgeta we oli stap go long tempol oli gat janis blong tekem long olgetawan ol stret kavenan ia mo wok ia we i go wetem rod blong olgeta mo ol narawan blong kam olsem God. Elda James E. Talmage i bin raetem:

Ol odinens blong endaomen i tekem sam wok we wan i mas mekem, olsem kavenan mo promes blong folem loa blong jastiti, blong gat jareti o bigfala lav, blong help, blong akseptem tingting blong man nating yu no agri wetem mo gat gud tingting; blong givim talen mo nara samting blong spredem trutok mo leftemap ol mankaen; blong holem taet wok blong trutok; mo blong lukaot long evri wei blong givhan long bigfala wok blong mekem wol i rere blong risivim King blong hem,—Lod Jisas Kraes. Taem yufala i tekem wanwan kavenan mo mekem ol wok blong wanwan long ol wok, oli stap promesem wan blesing, we yufala i save kasem nomo sapos yufala i stap folem ol kondisen blong hem. (*The House of the Lord*, pej 100.)

Yumi mekem kavenan wetem Lod blong givim taem blong yumi, ol talen mo ol samting long kingdom blong Hem.

Yumi ol kavenan pipol. Yumi mekem kavenan blong givim ol samting we yumi gat long saed blong taem blong yumi mo mane mo talen—evri samting we yumi, mo evri samting we yumi gat—i go long kingdom blong God long wol ia. Long ol simpol toktok, yumi mekem kavenan blong mekem gud samting. Yumi ol kavenan pipol, mo tempol i stap olsem senta blong ol kavenan blong yumi. Hem i stamba blong kavenan.

Kam long tempol. Yu mas kam long tempol. Long ples ia, bae i stap olsem proksi long wan we i bin ded finis, bae yufala i lukluk bakegen long ol kavenan we yufala i bin mekem. Bae yufala i mekem i kam strong long maen blong yufala ol blesing blong spirit we i go wetem haos blong Lod.

Stap fetful long ol kavenan mo ol odinens blong gospel. Kwalifae long ol tabu odinens ia wan afta wan taem yufala i stap muf i go tru long laef. Givim ona long ol kavenan we i go wetem olgeta. Mekem olsem mo bae yufala i stap hapi.

Bae ol laef blong yufala i stap long oda—evri samting i stap stret long oda, long stret rang, long stret laen blong olgeta.

Bae famle blong yufala bae i joen long wan oda we bae i neva save brok.

Ol blesing we yufala i save wok blong kasem insaed long tabu tempol oli lukluk nomo long ol kavenan mo ol odinens we yufala i mekem insaed long haos ia. Bae i tru we Lod bae i glad tumas taem wan bae i klin inaf long taetel ia: Wan kipa blong ol kavenan.

I MAS GAT SAMTING I AGENSEM

Ol tempol oli senta ia blong paoa blong spirit blong Jos. Bae yumi mas save se devel bae i traem blong blokem yumi olsem wan Jos mo wanwan long yumi taem yumi stap traem blong tekem pat long wok ia we i tabu mo i kam folem fasin we God i toktok long man. Ol samting we i kam blong blokem yumi i kam long ol defren wei we i stat long ol nogud fasin blong ol eli dei i go kasem taem wan i nomo gat intres long wok ia. Ating taem wan i nomo gat intres long wok ia nao i kam olsem wan bigfala denja mo i blokem bigwan wok blong tempol.

Tempol wok i mekem plante samting i kam blong blokem hem i go fored from se hem i wan stamba blong plante paoa blong spirit long ol Lata-dei Sent, mo long ful Jos.

Long konaston dedikesen blong Logan Tempol, Presiden George Q. Cannon i bin talemaot toktok ia:

Evri fandesen ston we oli putum blong wan Tempol, mo evri Tempol we oli finisim blong bildim folem oda blong Lod olsem we oli bin talemaot blong tabu Prishud ia, i mekem paoa blong Setan i go daon, mo i leftemap paoa blong God mo fasin blong kam olsem God, i muvum ol heven i go long ol bigfala paoa long bihaf blong yumi, i askem strong mo i askem ol blesing blong ol God we i No Save Finis mo olgeta we i stap wetem olgeta, i kam daon long yumi. (Insaed long "The Logan Temple," *Millennial Star*, 12 Nov. 1877, pej 743.)

Taem ol memba blong Jos oli wari o taem oli mas mekem ol bigfala desisen, ol samting ia oli stap hevi long maen blong olgeta, hem i wan samting we oli mekem oltaem, we i blong go long tempol. Hem i wan gudfala ples blong yumi lukluk long ol wari blong yumi. Insaed long tempol, yumi save lukluk ol

samting long saed blong spirit. Long ples ia, long taem blong tempol seves, yumi stap “aot long wol.”

Wan bigfala pat blong taem ia i impoten i from se yumi stap mekem wan samting blong wan we i no save mekem samting ia blong hemwan. Taem yumi stap mekem endaomen blong wan we i ded, long sam wei, yumi no stap tingting tu taem blong prea strong long Lod blong i helpem yumi. Taem ol yangfala kapol oli gat ol tingting blong mekem, sapos oli stap kolosap long tempol, i gat bigfala samting i stap blong oli tekem pat long wan sesen. I gat wan samting long spirit ples blong tempol we i klinim yumi mo i mekem ol samting i klia.

Samtaem, ol maen blong yumi oli trabol tumas wetem ol problem, mo i no gat wan samting we yu luk se yu mas mekem naoia, from se yumi no save tingting klia mo lukluk klia. Long tempol, das blong ol samting blong wol ia oli stap kamaot, trabol tingting ia i stat blong go lus, mo yumi save “luk” ol samting we yumi no bin save luk fastaem mo yumi faenem wan rod tru long ol trabol blong yumi we yumi no bin save luk fastaem.

Lod bae i blesem yumi taem yumi stap mekem ol wok blong tabu odinens blong tempol. Long ples ia, ol blesing blong yumi bae i no stop long ol tempol seves blong yumi. Bae yumi gat blesing long ol samting blong yumi long saed blong spirit mo tu long saed blong wol.

GO KOLOSAP LONG VEL

Yumi mas andastanem from wanem yumi stap bildim ol tempol, mo from wanem yumi mas mekem ol odinens ia. Afta long hemia, oltaem bae yumi stap kasem laet long ol samting we i impoten long spirit. Laet ia i kam wan laen afta wan laen mo wan tingting afta long wan tingting, kasem taem yumi kasem ful laet mo save. Ful laet mo save ia, i kam olsem wan bigfala proteksen long yumi—blong i tijim wanwan long yumi. Hem i wan proteksen tu long Jos.

I no gat wan wok i protektem moa Jos bitim tempol wok mo fasin blong lukaotem famle histri we i stap olsem sapot. I no gat nara wok i mekem spirit i kam antap moa. I no gat nara wok i

givim moa paoa long yumi. I no gat nara wok we i nidim wan we i gat ol hae standet blong fasin blong stap stret mo gud.

Ol wok blong yumi insaed long tempol i kavremap yumi wetem wan aean mo wan proteksen, long yumi wanwan mo long yumi olsem wan pipol.

Hem i long ol odinens blong tempol we oli putum yumi i stap long kavenan wetem Hem—long ples ia nao yumi kam olsem ol kavenan pipol.

Sapos yumi akseptem revelesen long saed blong wok blong tempol odinens, sapos yumi mekem ol kavenan blong yumi mo yumi no gat tu tingting long olgeta o yumi no faenem ekskius long olgeta, Lod bae i protektem yumi. Bae yumi kasem insperesen inaf blong fesem ol hadtaem blong laef.

Wok we i abaot ol tempol i tru. I bin kam tru long revelesen we i kam biae long vel mo revelesen i stap gohed.

Revelesen i save kam long wanwan memba blong Jos long saed blong tempol wok.

So kam long tempol—kam mo wok blong kasem ol blesing blong yufala. Hem i wan tabu wok.



JOS BLONG
JISAS KRAES
BLONG
OL LATA-DEI SENT

BISLAMA

